



Inatsisartuni ilaasortaq,
Mikivisuk Thomassen

§ 37 naapertorlugu apeqquteqaammut nr. 010 Qilalukkanik qernertanik pisassiisarnermut tunngasumut akissut

Ulloq: 05-02-2021
Suliap normua: 2021 - 2057
Akt normu: 15914648

Inatsisartut suleriaasissaanni § 37-mi imm. 1 naapertorlugu apeqqutinik Naalakkersuisunut nassiusaqaarsimavutit, *qilalukkanik qernertanik pisassiisarneq* pillugu. Apeqqutitit uanga suliassaqaarfisannut akisassanngortinneqaarsimapput.

Postboks 269
3900 Nuuk
Oqarasuaat (+299) 34 50 00
Fax: (+299) 34 63 55
E-mail: apn@nanoq.gl
www.naalakkersuisut.gl

- 1) *Naalakkersuisut qilalukkanik qernertanik pisassiisarneq pillugu kattufiit KNAPK. Suleqatigineqartarnerat qanoq ingerlava?*

Akissut 1)

Uanga isumaqarpunga KNAPK-lu suleqatigiinneq ingerlalluartoq. Pisassiissutinik aalajangiinissamut tunngatillugu susassaqaartunut tamanut Naalakkersuisut suleqateqarnerat assigiimmik ingerlanneqarpoq.

- 2) *Naalakkersuisut illoqarfikkartumik pisassiigaagamik pinirtut peqatigiifianik KNAPP Qaanaaq suleqateqartarpat?*

Akissut 2)

Naalakkersuisut taamatullu Naalakkersuisoqarfik KNAPP Qaanaaq-mut tunngatillugu assigiimmik suleqatigeeriaaseqarput, soorlu aamma apeqqut 1-imi akissutigineqartumi atuumassuteqartut taaneqarneratuulli. Takuuk aamma apeqqut 1-mut akissut.

- 3) *Naalakkersuisut qilalukkanik qernertanik ukiumut pisassiissutigineqartut allanngortariaqartut isumaqarpat?*

Akissut 3)

Pisassiissutit amerlassusissaat aamma sinaakkutissaat pillugit januaarip aappaani 2020 Naalakkersuisunit tamakkiisumik aalajangiunneqaareerput. Naalakkersuisut taamaasillutik ukiuni tulliuuttuni pisassiissutissat aalajangemissaannut piginnaatilerpaannga. Apeqqummi aqutsiveqarfiit sorliit pineqarnersut takujuminaappoq, taamaattorli pisassiissutinik aalajangiiniarnerit tamarmik ilisimatuussutsikkut innersuussinerit kiisalu tusarniaa-nermi akissutit tiguneqaarsimasut tunngavigalugit eqqarsaatiginiarneqartarput aamma aalajangerneqarlutik.

2021-mi pisassiissutit nalunaarutigineqaareerput taamaasillunga qilalukkanut qernertanut tunngatillugu allannguinnissamik pilersaaruteqanngilanga.

- 4) *Naalakkersuisut qanoq siunissaq eqqarsaatigalugu pisassiisarneq aqqissuussiffiginiarpaat?*

Akissut 4)

Pisassiissutinik aalajangiinnermut tunngatillugu Naalackersuisut aaqqissuusseriaatsip allanngortinnissaanut maannamut pilersaaruteqanngillat. Maannakkut sapaatit akunnerini 5-ni tusarniaanermi periuseq ingerlanneqartartoq Naalackersuisut tamanut pitsaanerpaasutut isumaqarfigaat. Taamaattoq piniakkanut killilersorneqartunut minnerunngitsumik qilalukkanut qernertanut tunngatillugu piniartut ilisimasaannik aaqqissuulluakkamik katersinissamut Naalackersuisut suleqataarusupput. Piniartut ilisimasaannik katersineq pisassiissutit aalajangerniarnerinut Naalackersuisunut sulit tunngavissaqarnerulluni iluaqutaasagalarpoq.

5) *Naalackersuisut piniartut siunnersuutaat qilalugarniartarneq pillugu qanoq isumaqarfigivaat?*

Akissut 5)

Naalackersuisut taamatullu Naalackersuisoqarfik isumaqarput piniartut ilisimasaat pingaartorujussuusut, taamaakkaluartoq ajoraluartumik ullumikkut piniartut ilisimasaat uppersaatalersukkamik tunngavilersuutitalinnik soorlu biologit pisarnerattut aaqqissuulluakkamik allatorneqartanngillat. Ilisimatuussutsikkut innersuussinerit saqqummiunneqartarput misissuinerit aalajangersimalluinnartut naapertorlugit uppersaanerit tunaartaralugit, biologinit misissuinnermut attuumassuteqanngitsunit uppersassutsimikkut misissorneqarsimasut. Assersuutigalugu pisassiissutinut ilisimatuussutsikkut amerlassusiliinerit qilalugaqatigiit annertussusaata tamakkiisup naatsorsorneqarnerata procent-itarisinnaavaa.

Piniartut tusarniaanermi amerlassutsinik kissaateqarnerat piffimmi pineqartumi namminneq pisariaqartitaannut tunngassuteqarsinnaavoq takusartakkatik naapertorlugit. Ajoraluartumik piniartunit ilisimasat uppersaasarsorlugit allatorneqarnikuunngillat, assersuutigalugu ingerlaarfiinut tunngasut, neriniarfiinut tunngasut, piaqqisarnerinut tunngasut, qilalugaqatigiikkuutaat isikkuinut tunngasut assigisaallu. Piniartut allallu atuisut qulannangitsumik ilisimasalerujussuupput taamaattoq aaqqissuussamik KNAPK-mit imaluunniit peqatigiiffiinit allatorneqarsimanngitsunik, pisassiissutinik anginerusunik qinuteqarnermi tunngavissatut atorneqarsinnaasut. Taamaakkaluartoq aalajangiinissaq sioqqullugu piniartut kissaataat qinnutaallu oqimaaqatigiissaarinnermut ilanngunneqartarput. Aalajangiiniarnermi qinnuteqaataat piviusunngorsinnaanersut aammalu qinnuteqaataasa piviusunngortinnissaanut tunngavissaqarnerisooq nalilersorneqartarpoq. Naalackersuisut uumasut pinngortitaassutsiminni inissisimanerat aammalu innuttaasuni neqissaqarniarnermut pisariaqartitat eqqarsaatigisariaqartarpat. Periarfissarititaasut taamaatsillugit tamat kissaatigisaat Naalackersuisunit naammassineqarsinnaanngillat.

Qilalukkanut qaqortanut aamma qernertanut tunngatillugu Aalisarnermut, Piniarnermut Nunalerinermullu Naalackersuisoqarfik kingullermik november 2020-imi ataatsimiinnermi piniartut atuisullu ilisimasaannik aaqqissuulluakkamik suliaqartoqartariaqartoq taasaqarpoq kiisalu piniartut biologillu akornanni suleqatigiilluarnerunissamik. Naalackersuisoqarfiup piniartut immikkut biologillu immikkut suleqatigai. Kingullermik 2020-mi upernaakkut Naalackersuisoqarfik piniartut biologillu akunnerminni pitsaanerusunik suleqatigiittoqarnissaanik inassuteqaralarpoq, ukiorpassuarni KNAPK-p Pinngortitaleriviullu suleqatigiinissamik isumaqatigiissutaata atuuttup saniatigut.

Tunumi qilalukkat qernertat pillugit piniartut atuisullu ilisimasaasa katersorneqarnissaanik kissaateqarneq pillugu paasititsinissamut APNN ikiuussinnaanermik neqeroorsimagalarpoq NAMMCO-p ukiumoortumik ataatsimiinnissaanut atatillugu, apeqqut 4-mut akissut aamma takujuk.

6) Qilalukkanik pisassiisarneq pillugu kikkut suleqatigineqartarpat?

Akissut 6)

Naalackersuisut Tunu pillugu NAMMCO-miit aamma Kitaa pillugu Nunatta Canadallu akornanni Qilalukkat pillugit Ataatsimoorussamik Kommissionimiit - JCNB-minngaaniit inassuteqaatinik tigusaqartarput. Naalackersuisut biologit inassuteqaataat aamma tusarniaanermi tusarniakkat akissuteqaataat aallaavigalugit inaarutaasumik aalajangiisarput.

Aqutsiveqarfinni allannguutit tamarmik, ilaatigut piniakkanut killilersukkanut ukiumoortumik pisassiisarneq ilanngullugit tusarniutigineqaqqartarput, aalajangiinissaq minnerpaamik sapaatit akunnerinik 5-nik sioqqullugu tusarniutigineqartarput.

Tusarniutit susasaqartunut tamanut nassiunneqartarpoq, ukuusut KNAPK, kommuuninut tamanut, Kalaallit Nunaata Pinngortitalerivianut, Piniarneq pillugu Siunnersuisoqatigiinnut, SQAPK-mut kiisalu Pinngortitamut Ilisimatusarnermullu Naalackersuisoqarfimmut. KNAPK aamma Kommuunit piniartut peqatigiiffiisa taamaalillutillu piniartut tusarniutigineqartut assigiinngitsut pillugit ilisimatinneqarnissaat isumannaartussaavaa aamma ataatsimoortumik akissuteqarnissamut aaqqissuillutik. Ilangullugu tusarniutigineqartut akissutigineqartullu Naalackersuisut quppersagaanni nassaari-neqarsinnaanngortarput, tassanilu kikkulluunniit akissuteqarnissamut tusarniummullu akissuteqarsimasut allataatatuarneqarsinnaanngortarlutik.

Inussiarnersumik inuulluaqqsillunga



Jens Immanuelson
Aalisarnermut, Piniarnermut Nunalerinermullu Naalackersuisoq